

全五代詩

全史詩

全五代詩卷六十六

羅江李調元雨村編

吳越

武肅王錢鏐

鏐字具美臨安人唐末以鄉兵討平劉漢宏

董昌奄有十三州建國稱吳越王諡武肅五代

詩話開平元年梁封錢武肅鏐爲吳越王改其鄉臨安縣爲臨安衣錦軍是年省瑩隴延故老旌鉦鼓吹振耀山谷自昔游釣之所盡蒙以錦繡或樹石至有封官爵者舊買鹽肩擔亦裁錦韜之爲牛酒大陳鄉飲別張蜀錦幄以飲婦女凡八十以上金樽百歲以上玉樽時飲玉者尚不減十餘人鏐起執爵自唱還鄉歌以娛賓云云時父老雖聞歌進酒都

不之曉武肅覺其歡意不甚浹洽再酌酒唱
吳歌曰你輩見儂底歡喜別是一般滋味子
永在我儂心子裏歌闌合聲賡贊叫笑歡感
閭里今山民尚有能歌者 吳越備史武肅
將築捍海塘患江濤衝激命強弩五百以射
濤頭又親築胥山祠禱之曰願息忠憤之氣
暫收洶湧之潮函詩一章置海門云傳語龍
王并水府錢塘借與築錢城既而濤頭遂趨
西陵 全唐詩話王好吟詠通圖緯學喜作
正書暇則命諸子孫誦詩賦或以所製詩
什賜丞相及將吏以下羅隱寢疾鏐臨問題
其壁云黃河信有澄清日後代應難繼此才
隱以紅紗罩其上謝詩有壁閒章句動風雷
此也隱身後無文嗣鏐詩爲之識 晉公談
錄武肅所言皆可律下忽一日雜役兵士於
公署壁題云沒了期沒了期營基纔了又倉
基部轄者皆怒王曰不必怒續書云沒了期
沒了期春衣纔了又冬衣卒伍見之怡然力
役不復怨咨 湘山野錄徐彥海鹽人前後
從征伐有功及李彥徽奔淮南王親巡吳興

題詩嬰蘭堂在湖州東南溪次末云須將一片地付與有心人眾不測王將登舟顧彥日以此郡付汝北夢瑣言或有述李頻詩於錢尚父日只將五字句用破一生心尚父日可惜此心何所不用而破於詩句苦哉東坡陌上花詞序吳越王妃每歲必歸臨安王以書遺妃日陌上花開可緩緩歸矣吳人用其語爲歌含思宛轉聽之凄然而其語鄙野爲易之

巡衣錦軍製還鄉歌

三節還鄉兮挂錦衣碧天朗朗兮愛日暉功成道上
兮列旌旗父老遠來兮相追隨家山鄉眷兮會時稀
今朝設宴兮觥散飛斗牛無孖兮民無欺吳越一王
兮駟馬歸

忠懿王錢俶

俶字文德吳越武肅王鏐孫文穆王元瓘子

大將胡進思等廢忠遜王侑立之建隆元年

授天下兵馬大元帥太平興國三年納土歸

京師封許王徙封鄧王薨追封秦國王諡忠

懿著有政本集

後村集予讀絳帖有錢忠懿王使院律詩一首練句結字

未在高駢羅紹威之下後于墨林方氏見忠

懿與其子遺墨五副草聖奇古簡而不煩得

鍾王意時忠懿方自杭朝京師每書必云吾

極無事又云不用憂心事已如此識天命之

有歸知王者之無敵脫屣去之無一毫失國

之恨異乎事窮勢迫然後面縛奉降賤揮淚

對宮娥者矣初天禧中文僖公嘗刊忠懿十

八帖與墨林此帖草法酷似碑今已足貴况

眞蹟乎 后山詩話吳越後王俶來朝太祖
爲置宴出內伎彈琵琶王獻詞云金鳳欲飛
遭掣搦情脈脈看卽玉樓雲雨隔太祖起拊
其背曰誓不殺錢王 十國春秋侍郎鮑約
頗從史忠懿王納土及王歸宋約竄處海上
王以詩追之曰東遐追追兮西遐追鮑約何如
罷釣歸迄今有遐追廟焉 湘山野錄錢思
公謫居漢東日撰一曲每歌之酒闌則垂涕
後閣尚有故國一白髮姬乃鄧王俶歌鬟驚
鴻者也曰吾憶先王將薨預戒輓鐸中歌木
蘭花引絳爲送今相公其將已乎果薨於隨
鄧王俶舊曲亦有帝鄉煙雨銷春愁故國山
川空淚眼之句頗相類 玉壺清話黃夷簡
閑雅有詩名在錢忠懿王俶幕中陪尊俎二
十年今開寶初太祖賜俶開吳鎮越崇文耀
武功臣遣夷簡謝于朝將歸上謂曰歸語元
帥朕已于薰風門外建離宮規模華壯不減
江浙兼賜名禮賢宅以待李煜與元帥先朝
者卽賜之夷簡受天語俛首而歸私自籌曰
茲事大難王或果以去就之計允決于我胡

以爲對迨歸見叙因匿不盡以天語授之遂
稱疾于安溪別業保身潛遁夷簡山居詩有
宿雨一番蔬甲嫩春山幾焙茗旗香之句
吳越備史帝以王春山幾焙茗旗香之句令
書筆跡王以風恙手不能握筆命將往時所
書絹圖草字遣世子惟濬同中使以進下詔
獎諭仍賜金匣玉硯一副等物夏四月召王
宴於後苑帝曰春氣暄和萬物暢茂四海安
甯朕當以天下之樂
爲樂宜令賞花賦詩

宮中作

廊廡周遭翠幙遮禁林深處絕喧譁界開日影憐窗
紙穿破苔痕惡筍芽西第晚宜供露茗小池寒欲結
冰花謝公未是深沈量猶把輸贏局上誇

彭城郡王錢惟治

惟治字和世吳越忠遜廢王侑長子忠懿王
俶養爲己子八歲授兩浙牙內諸軍指揮使
判軍糧營田事遷德化軍使檢校太保改奉

國軍節度使忠懿王八覲權國事歸宋領鎮

國軍節度使左騎衛上將軍卒追封彭城郡

王有集十國春秋惟治草隸擅絕尤好三王

其中矣常以鍾繇王羲之康元示墨跡凡七

軸裝潢爲獻太宗嘗與翰林賀正顯評惟治

書曰諸錢皆效浙僧亞棲之蹟故筆無骨獨

惟治工耳惟治好學家聚法帖圖書萬餘卷

多異本生平慕皮陸爲詩有集十卷又有寶

子垂綬連環詩迴文詩也寶子卽香爐世多
稱之書跡恆爲人藏弄吳越世家疑辨俶
以嫡嗣惟濬無檢故器惟治數傳權資遣軍

國之務泊入朝惟濬止奉朝請而委惟治藩
在焉 湖州府志吳越廻文綬帶連環詩碑
在法華寺節度使錢惟治作九
十首今祇見冰川詩式一首

春日登大悲閣廻文

聖主欽崇教千光顯紺容映雲窗綺暖籠月箔花重
淨刹香風遠危闌碧霧濃勝因良以詠華國一斯逢
寶子垂綬連環詩

碧天臨廻閣晴雪點山屏夕烟侵冷箔明月歛閑亭
英國公錢惟演

惟演字希聖吳越忠懿王俶之子少補牙門
將歸宋累遷翰林學士樞密使罷爲鎮國軍

節度觀察留後改保大軍節度使知河陽入
朝加同中書門下平章事落職改崇信軍節
度歸鎮卒追封英國公諡曰思改諡文僖有

擁旄集伊川集

苕溪魚隱叢話歐公花品序云子居府中時嘗謁思公見

一小屏立後細書序滿其上思公指之曰欲作花品此是牡丹名凡九十餘種然予所見而今人多稱者纔三十許不知思公何從而得之多也東坡云惟演爲西都留守如置驛貢洛花識者鄙之此宮妾愛君之意也故于荔枝嘆亦云洛陽相君忠孝家可憐亦進姚黃花蓋爲思公惜之也十國春秋惟演文詞清麗于書無所不讀家儲文籍侔秘府所著有典懿集二十卷又著金波遺事飛白書叙錄逢辰錄奉藩書事若干卷子暖晦暄從弟易易子彥遠明逸入宋俱以制策登科爲錢氏一時之盛東都事畧惟演幼時父俶

使賦遠山有句云高爲天一柱秀作海三峯
俶嘆賞久之總龜惟演送劉綜鎮并州云
置酒軍中樂聞笳塞上情奉使塗中云雪意
未成雲著地秋聲不斷鴈連天又客亭厭見
名長短村酒那能辨聖賢又送僧遊楚云宿
舍孤烟起行衣夢雨涼又送章衡州云平檻
曉波吳榜渡遠城春樹越禽飛又太乙宮云
神宮古柏啼烏起齋室虛簾宿霧通又西洛
懷古云日上故陵烟漠漠
春歸空苑水潺潺俱佳

春曉曲

城上風光鶯語亂城下烟波春拍岸綠楊芳草幾時
休淚眼愁腸先已斷情懷漸變成衰晚鸞鏡朱顏驚
暗換昔年多病厭芳樽今日芳樽惟恐淺

槿花

綺霞初結處朱露未晞時寶樹甯三尺華燈更九枝
亭亭方自喜黯黯卻成悲欲作飛煙散猶憐返照遲
秋夕池上

珪月上金塘煙容帶水光朱華接蘭坂綠荇溢魚防
叢暗禽棲密林疎露下涼秋懷已潘鬢無奈更啼螳
上巳玉津園賜宴

漢家傳洛飲楚俗泛蘭泉玉液初頒酒金盤屢擊鮮
珥彤筠竹籟傾蓋集芝廬錦羽翻晴旭霞英落暖煙
雅音和舜樂睿澤洽堯天更聽承雲曲同歌在鎬年
再賦荷花

玉梵引清泉風高露白天盈盈臨一水羃羃隔長煙
已分蘭芝溺仍憂趙后仙鮫絲衣更密珠蚌淚長圓
瑟怨來湘浦鴻驚近洛川金塘正斜照誰倚木蘭船
致齋太乙宮

齋潔奉惟馨瑤臺獨自升樓迷五里霧壇燭九枝燈
珠館來青雀璇題射玉繩疎鐘平野濶古柏夕霏凝
鶴扇眞窺月仙衣可鏤冰春茶泛雲液曉飯薦蘭蒸
鍊藥疑洪井藏書類羽陵回瞻大帝室飛檻更長憑

夜讌

昨夜宴南堂華燈燭九光削青爭落筆舉白鬪飛觴

祇覺輝裴玉甯思夢謝塘解煩憑密勺藉俎半蘭房
促席風絃怨開簾月露涼酡顏君莫訴西北轉銀潢

宣曲

絳縷初分後銀環未解時已障紈扇笑猶捧玉壺悲
乞巧長生殿迎風太液池雕屏涵火齊寶帳隔琉璃
欲買詞人賦空傳狎客詩蔗漿消內熱瓊蔬療朝饑
綺蒂桃初熟紅心草欲披凌波渡羅襪向日翳華芝
素臉分甘柰香津滴紫梨龍梭隨振素獺髓補凝脂
蓬餌重陽節金針七夕期玉膏當瀦溢翠蓋逐葳蕤
弦急哀隨指歌長憾八眉青鸞惟有舞赤鳳可能疑

下蔡迷還易平陽破未知髻高釵自墜腰細佩長垂
出恐嚴鐘晚歸嫌細幃遲轆轤驚曉夢鸚鵡漏春思
魂怨惟愁斷腸柔已自危壁璫螢影度瓊戶蘚花滋
掩鼻讒誰訴披圖悔豈追祇應金帶枕聊爲達微詞

別墅

別館土城傍斜軒映曲房蒼頭冠綠幘中婦織流黃
複道登平樂期門集未央意錢梁冀宅挾瑟莫愁堂
走馬章臺柳停車陌上桑轂弓隨寶帳投轄付銀牀
出戴繁星急歸衢細雨忙曾過阿君宿醉舞起桃梁

清風

溽暑迎秋盡涼飈逗曉迴墜桐侵玉井拂柳度章臺
已覺雲翹動還驚月幌開鮫簾移亂影瑤瑟泛餘哀
扇掩藏鸞羽荷傾側露杯正當河左界不待雨東來
自好傳垂翼甯勞起死灰楚宮誰第賦宋玉最多才

屬疾

積日勞無補彌天疾未瘳馬卿非避事盛憲自多憂
目眩花成果心驚蟻鬪牛幽冰那浣熱洛笛更生愁
拂枕窗風度穿簾隙日流唾壺從已缺博齒亦慵投
發篋尋桐籙支頤動越謳平生江海志夕夢繞滄洲

荷花